

## Rätslrotse bei der Worschkoschtprob

Noh dere Worschkoschtprob is mer doch immer aa gspannt, was anri Zeitunge derdriwert schreiwe, was im Fernseh gewies git. Jetzer is des jo eenfach, mer brauch nor ins Internet gehn un schun kann mer Zeitung lese. Was mir als erschetes ins Au gstocho is, war die Tatsach, dass alli Zeitungsschreiwere rum gerätselt han, zum wievielte Mol des Ereignis stattgfunn hat. Iwer die Wkp bei dere NBZ weess ich nit so genau Bescheid. Awer die BZ hat die Wkp in dem Jahr zum 13. Mol veranstalt. Was mer in de rumänische Zeitunge hat lese kenne, des war alles Quatsch. Manchi han gschrieb, es war die 36. Auflage, anri hätte gement die 35., un wieder anri ware der Meinung, es wär die 12. Wkp gewenn.

Es is aach vill iwer de Vetter Țintoi aus Knies gschrieb gin, der desmolrum alli drei Preise gschnappt hat. Er war awer so anständig un hat am Mikrofon behaupt, dass er noh dem Volltreffer nimi mit Worschtprowe in de Wettbewerb trete tut (es bleibt abzuwarte!). Ich han jo awer kommentiere wille, was die Zeitunge behauptete: also de Vetter Țintoi soll quasi schon bei der Wkp 1993 e Preis dervungetraa han. Des stimmt iwerhaupt nit! Weil in sellem Jahr hat die domolich NBZ genuch anri Schwierichkeite ghat un die BZ is zum erschte Mol am 10. November 1993 als Wucheblatt der ADZ erschien. Also war in dem Jahr mit Sicherheit gar ke Wkp.

Also, wie schon betont, die erschti Wkp der BZ war im Jänner 1995. Selmols is des Ereignis in kleenem Rahme, in der BZ-Redaktion gfeiert gin. Am e scheene Morjet hat uns de Walter Jass, der selmols unser Scheef war, zammgetrummelt un verkind, dass mer die Wkp wieder infiehere were. Un natierlich ware mer alle mit derbei.

Un der Wkp-Tach is schnell angerickt kumm. Es ware so an die zehn Worschtbringer, natierlich aa e Schürrie un Gäscht. Selmols hat de Vetter Alois Gillich aus Lowrin e Preis gewunn, sei Diplom hängt aach noch am heitiche Tach im Glasgang uf em Ehreplatz.

E Jahr druf is die Wkp dann im Adam-Müller-Guttenbrunn-Haus abghal gin, es ware meh Worschtbringer, meh Gäscht un aa meh zu Esse un zu Trinke. Un vun dann an han immer meh Leit Intresse an dere Veranstaltung ghat, han mitgemacht un sich an sellem Tach, am Feschtach der Banater Zeitung, mitnaner wohlgfiehl.

So sin die Johre vergang, mit der Zeit is de letschte Dunnerschdach im Jänner jährlich zum Worscht-Verkoscht-Tach erklärt gin. Es wille immer meh Leit derbei sin, doch leider sin immer wenicher vun de, die wu a e Stang Worscht spendiere wille. Un ausser dem Worscht muss noch vill meh uf die Tische kumme. Heijer hat mer die Krise, vun der iwerall gered werd, aach bei dere Wkp gspiirt un gsiehn. Leit ware meh wie genuch zammkumm, doch an de Sponsore hats stark ghapert.